

宋高僧傳卷第十四

家四

宋左街天壽寺通慧大師賜紫沙門贊寧等奉勅撰

明律篇第四之一 正傳二十人 附見五人

唐京兆西明寺道宣傳一 大慈

唐京兆恒濟寺道成傳二 家四

唐京師崇聖寺文綱傳三 名恪

唐京師恒濟寺懷素傳四 賔師

唐光州道岸傳五

唐百濟國金山寺真表傳六

唐安州十力寺秀律師傳七

唐京師崇聖寺靈巖傳八

唐京兆崇福寺滿意傳九

唐京兆西明寺崇業傳十

唐越州法華山寺玄儼傳十一 洛融

唐杭州靈智寺德秀傳十二

唐開業寺愛同傳十三 玄通

唐五臺山詮律師傳十四

唐揚州龍興寺法慎傳十五

唐杭州華嚴寺道光傳十六

唐揚州大雲寺鑒真傳十七

唐杭州天竺山靈隱寺守直傳十八

唐洪州大明寺嚴峻傳十九

唐會稽開元寺曇一傳二十

唐京兆西明寺道宣傳 大慈

釋道宣姓錢氏丹徒人也一云長城人其先

出自廣陵太守讓之後洎太史令樂之撰天

文集占一百卷考諱申府君陳吏部尚書皆

高矩令猷周仁全行盛德百代君子萬年母

娘而夢月貫其懷復夢梵僧語曰汝所姓者

即梁朝僧祐律師祐則南齊剡溪隱嶽寺僧

護也宜從出家崇樹釋教云凡十二月在胎四月八日降誕九歲能賦十五厭俗誦習諸經依智顓律師受業洎十六落髮所謂除結非欲染衣便緜日嚴道場弱冠極力護持專精克念感舍利現于寶函隋大業年中從智首律師受具武德中依首習律纔聽一徧方議修禪顓師訶曰夫適遐自邇因微知章修捨有時功願須滿未宜即去律也抑令聽二十徧已乃坐山林行定慧晦迹於終南做掌之谷所居乏水神人指之穿地尺餘其泉迸涌時號為白泉寺猛獸馴伏每有所依名華芬芳奇草蔓延隋末徙崇義精舍載遷豐德寺嘗因獨坐護法神告曰彼清官村故淨業寺地當寶勢道可習成闍斯卜焉焚功德香行般舟定時有羣龍禮謁若男若女化為人

形沙彌散心顧盼邪視龍赫然發怒將搏攫之尋追悔吐毒井中具陳而去宣乃令封閉人或潛開往往煙上審其神變或送異華一奩形似棗華大如榆莢香氣馥醇數載宛然又供奇果季孟黎柰然其味甘其色潔非人間所遇也門徒嘗欲舉陰事先是潛通以定觀根隨病與藥皆此類者有處士孫思邈嘗隱終南山與宣相接結林下之交每一往來議論終夕時天旱有西域僧於昆明池結壇祈雨詔有司備香燈供具凡七日池水日漲數尺有老人夜詣宣求救頗形倉卒之狀曰弟子即昆明池龍也時之無雨乃天意也非由弟子今胡僧取利於弟子而欺天子言析兩命在旦夕乞和尚法力加護宣曰吾無能救爾爾可急求孫先生老人至思邈石室究

訴再三云宣律師示我故敢相投也邈曰我知昆明池龍宮有仙方三十首能示余余乃救爾老人曰此方上界不許輒傳今事急矣固何所怪少選捧方而至邈曰爾速還無懼胡僧也自是池水大漲數日溢岸胡僧術將盡矣無能爲也及西明寺初就詔宣充上座三藏法師至止詔與翻譯又送真身往扶風無憂王寺遇勅令僧拜等上啓朝宰護法又如此者撰法門文記廣弘明集續高僧傳三寶錄羯磨戒疏行事鈔義鈔等二百二十餘卷三衣皆紵一食唯菽行則杖策坐不倚牀蚤蟲從遊居然除受土木自得固已亡身嘗築一壇俄有長眉僧談道知者其實賓頭盧也復三果梵僧禮壇讚曰自佛滅後像法住世興發毗尼唯師一人也乾封二年春冥感

天人來談律相言鈔文輕重儀中舛悞皆譯之過非師之咎請師改正故今所行著述多是重修本是也又有天人云曾撰祇洹圖經計人間紙帛一百許卷宣苦告口占一一抄記上下二卷又口傳偈頌號付囑儀十卷是也貞觀中曾隱沁都雲室山人睹天童給侍左右於西明寺夜行道足跌前階有物扶持履空無害熟顧視之乃少年也宣遽問何人中夜在此少年曰某非常人即毗沙門天王之子那吒也護法之故擁護和尚時之久矣宣曰貧道修行無事煩太子太子威神自在西域有可作佛事者願爲致之太子曰某有佛牙寶掌雖久頭目猶捨敢不奉獻俄授于宣宣保錄供養焉復次庭除有一天來禮謁謂宣曰律師當生觀史天官持物一苞云是

棘林香爾後十旬安坐而化則乾封二年十月三日也春秋七十二僧臘五十二累門人窆于壇谷石室其後樹塔三所高宗下詔令崇飾圖寫宣之真相匠韓伯通塑績之蓋追仰道風也宣從登戒壇及嘗泥曰其間受法傳教弟子可千百人其親度曰大慈律師授法者文綱等其天人付授佛牙密令文綱掌護持去崇聖寺東塔大和初丞相韋公處厚建塔於西廊焉宣之持律聲振竺乾宣之編修美流天下是故無畏三藏到東夏朝謁帝問自遠而來得無勞乎欲於何方休息三藏奏曰在天竺時常聞西明寺宣律師秉持第一願往依止焉勅允之宣持禁堅牢捫虱以絲紙裹投于地三藏曰撲有情于地之聲也凡諸密行或制或遮良可知矣至代宗大曆

案四

五

二年勅此寺三綱如聞彼寺有大德道宣律師傳授得釋迦佛牙及肉舍利宜即詣右銀臺門進來朕要觀禮至十一年十月勅每年內中出香一合送西明寺故道宣律師堂爲國焚之禱祝至懿宗咸通十年左右街僧令霄玄暢等上表乞追贈其年十月勅謚曰澄照塔曰淨光先所居久在終南故號南山律宗焉天寶元載靈昌太守李邕會昌元年工部郎中嚴厚本各爲碑頌德云

系曰律宗犯即問心心有虛實故如未得道起覆想說則宜犯重矣若實有天龍來至我所而云犯重招謗還婆羅漢同也宣屢屢有天之使者或送佛牙或充給使非宣自述也如遣龍去孫先生所豈自言邪至于乾封之際天神合沓或寫祇洹圖經付囑儀等且非

寓言於鬼物乎君不見十誦律中諸比丘尚揚言目連犯妄佛言目連隨心想說無罪佛世猶爾像季嫉賢斯何足怪也又無畏非開元中者貞觀顯慶已來莫別有無畏否唐京兆恒濟寺道成傳

釋道成者不知何許人也居于天邑演彼律乘戒月揚光圓而不缺德瓶告實滿而不傾當顯慶中敷四分一宗有同霧市時文綱律匠雖先依澄照大師後習律文乃登成之堂與矣又懷素著述皆出其門垂拱中日照三藏譯顯識等經天后詔名德十負助其法化成與明恂嘉尚同預證義由是聲飛神甸位首方壇謂之梧桐多棲鳳鳥謂之芳芷頗秀蘭叢門生孔多無過此集然不詳終所系曰成公與隋蔣州道成同號而異實二者

宋四

六

奚先通曰隋成也精乎十誦著述尤多唐成也傳乎四分譯講借妙然其撰集則開悟迷淪究其翻傳則陶甄教道譬猶後燄靡及乎前光似寶或慙乎真寶互有長短用則無遺也

唐京師崇聖寺文綱傳

名

釋文綱姓孔氏會稽人也曾祖範陳都官尚書祖禊祠部侍郎考頂生逃海避隋擇木歸舜貞觀始拜尚乘直長咸光復儒業旁通釋教是故綱也植宿根從習氣慈母懷孕雜食棄捐有婆羅門僧頭陀語其母曰若此男終紹三寶自爾每聞空中多異香雜仙樂及誕育之日白鶴翔集若臨視焉比襁褓中午後不受乳哺猶堅持齋者童齒隨師訪道十二出家冠年受具精慮苦行專念息心藜藿糗

粮麻衣草薦標有彘檢口無溢言尋詣京兆沙門道成律師稟毗尼藏二十五講律三十登壇每勤修深思疑視反聽淨如止水巖若斷山或風雨宴居或晝夜獨得故能吉祥在手不捨其餅威德迎風不絕於氣出籠瘠鴈坐致虛空起屋下層自然成就唯甘露之滯口喻利劍之傷人慎之重之廣矣至矣由是八方來學四分永流請益者舉袂雲臨讚歎者發聲雷駭久視中天作淫雨人有憂色網愍之乃端坐思惟却倚屋壁奄至中夕歛爾半頃唯餘背間嶽然山立識者以為得神通因定力故日月靈跡幽明潛感兆於集事應乎遺言左右怪之網曰夫真實無相塵色本空正覺圓常大悲湛定不可取也是以一時法主四朝帝師同迦葉之入城遇匿王之說

戒竹園門外別有沙彌畢樹枝間廣聞鴉鳥所以受潤者博入見者深萬病已痊獲歡喜之藥一心不染解煩惱之繩又恭承絲綸京都翻譯追論惠用遠契如因翹誠滿朝檀施敵國但依布薩盡用莊嚴累歷伽藍二十餘所凡是塔廟各已華豐猶且刺血書經向六百卷登壇受具僅數千人至苦至勤納無我之海不寢不食種無生之田長安四年奉勅往岐州無憂王寺迎舍利景龍二載中宗孝和皇帝延入內道場行道送真身舍利往無憂王寺入塔其年於乾陵宮為內尼受戒復於宮中坐夏為二聖內尼講四分律一徧中宗嘉尚為度弟子賜什物綵帛三千匹因奏道場靈感之事六月七日御札題榜為靈感寺是也諸寺辟碩德以隸焉夫其左籞宿右

上林南臺終山北池渭水千門宮闕化出雲
霄萬乘旌旗天迴原隰先天載睿宗聖真皇
帝又於別殿請為菩薩戒師妃主環階侍從
羅拜兜率天上親聽法言王舍城中普聞淨
戒恩旨賜絹三千餘疋網悉付常住隨事修
管或金地繚垣用增上價或寶坊飛閣克壯
全模或講堂經樓舍利淨土或軒廊器物廚
庫園林皆信施法財周給僧寶方將示迷津
引覺路濯熱火宅拯溺毒流而乃奄忽神遷
斯須薪盡雖有應化何其速歟以開元十五
年八月十五日怡然長往時春秋九十有二
其年九月四日塔于寺側焉聞哀奔喪執紼
會葬香華幢蓋緇素華夷填城塞川篲雲翳
景蓋數萬人有若法侶京兆懷素滿意承禮
襄陽崇拔扶風鳳林江陵恒景淄川名恪等

百餘人咸曰智河舟遷法宇棟撓而已哉有
若弟子淮南道岸蜀川神積岐隴慧顛京兆
神慧思義紹覺律藏恒暹崇業等五十餘人
並日以慈眼入於度門金棺不追灰骨罔答
乃請滑臺太守李邕為碑邕象彼馬遷法其
班氏以二人而同傳必百行以齊肩不忝懷
素前不慙宣師後李北海題品不其躋乎有
淄州名恪律師者精執律範切勤求解嘗廁
宣師法筵躬問鈇序義宣師親錄隨喜靈感
壇班名于經末又附麗文網之門也

唐京師恒濟寺懷素傳實律師

九

釋懷素姓范氏其先南陽人也曾祖嶽高宗
朝選調為絳州曲沃縣丞祖徽延州廣武縣
令父強左武衛長史乃為京兆人也母李氏
夢雲雷震駭因而娠焉誕育之辰神光滿室

見者求占此子貴極當爲王者之師傅也幼齡聰黠器度寬然識者曰學必成功才當逸格耳聞口誦皆謂未成年及十歲忽發出家之意猛利之性二親難沮貞觀十九年玄奘三藏方西域迴誓求爲師雲與龍而同物星將月以共光俱懸釋氏之天悉麗著明之象初尋經論不費光陰受具已來專攻律部有鄴郡法礪律師一方名器五律宗師迷方皆俟其指南得路咸推其鄉導著疏十卷別是命家見接素公知成律匠研習三載乃見諸瑕喟然歎曰古人義章未能盡善咸亨元年發起勇心別述開四分律記至上元三年丙子歸京奉詔住西太原寺傍聽道成律師講不輟緝綴永淳元年十軸畢功一家新立彈糾古疏十有六失焉新義半千百條也傳翼

之彪搏攫而有知皆畏乘風之震碑鞠而無遠不聞所化翕然所傳多矣復著俱舍論疏一十五卷遺教經疏二卷鈔三卷新疏拾遺鈔二十卷四分僧尼羯磨文兩卷四分僧尼戒本各一卷日誦金剛經三十卷講大律已疏計五十餘徧其餘書經畫像不可勝數於本寺別院忽示疾力且薨然告秀章曰余律行多缺一報將終時空中有天樂瀏亮奄然而逝俗齡七十四法臘五十三葬日有鴻鶴遶塔悲鳴至暮方散素所撰述宗薩婆多何邪以法密部緣化地部出化地從有部生故教四出受體以無表色也又斥二宗云相部無知則大開量中得自取大小行也南山犯重則與天神言論是自言得上人法也大抵素疏出謂之新章焉開元中高山賓律師造飾宗

記以解釋之對礪舊疏也又謂爲東西塔律宗因傳習處爲名耳大曆中相國元公載奏成都寶園寺置戒壇傳新疏以俸錢寫疏四十本法華經疏三十本委寶園光翌傳行之後元公命如淨公爲素作傳韋南康臯作靈壇傳授毗尼新疏記有承襲者刊名于石其辭首麗其翰兼美爲蜀中口實焉

唐光州道岸傳

釋道岸姓唐氏世居潁川是爲大族漢尚書令琳司空珍吳尚書僕射固雍州刺史彬涼鎮北將軍瑤之後也永嘉南度遷于光州衣冠人物暉映今古岸生而不群少而奇槩爰在髻亂有若老成齒冑膠庠侑齊墳典猶恐聞見未博藝業有遺遂浮江淮達洙泗探禹穴升孔堂多歷年所矣操翰林之鼓吹游學

家四

十一

海之波瀾討論百家商榷三教乃歎曰學古入官紆金拾紫儒教也餐松餌栢駕鶴乘龍道教也不出輪迴之中俱非棧喻之義豈若三乘妙旨六度宏功錙銖世間掌握沙界哉遂落髮出家洗心訪道一音克舉四句精通堅修律儀深入禪慧夜夢迦葉來爲導師朝閱真經宛契冥牒由是聲名籍甚遠近吹噓爲出世之津梁固經行之領袖十方龍象罔不師範焉萬國鷄鷲無敢訕對者向若迴茲妙識適彼殊途議才必總於四科濟世雅符於三傑有若越中初法師者秘藏精微罔不明練道高寰宇德重丘山岸聞善若驚同聲相應乘杯去楚杖錫遊吳雲霧一披鐘鼓齊振期牙合契澄什聯芳由是常居會稽龍興寺焉揚越黎庶江淮釋子輻輳烏合巷少居

人罕登元禮之門且覩公超之市岸身遺纏蓋心等虛空不擇賢愚無論貴賤溫顏接待善誘克勤明鑑莫疲洪鐘必應皆窺天挹海虛往實歸其利博哉無得稱也時號爲大和尚登無畏座講木叉律容止端嚴辭辯清暢連環冰釋理窟毫分瞻仰者皆悉由衷聽受者得未曾有於是高僧大士心醉神傾捐棄舊聞佩服新義江介一變其道大行孝和皇帝精貫白業遊藝玄樞聞而異焉遣使徵召前後數介然始入朝與大德數人同居內殿帝因朝暇躬閱清言雖天暎屢迴而聖威難犯凡厥目對靡不魂驚皆向日趨風滅聽收視岸人望雖重僧臘未高猶淪居下筵累隔先輩惜帝有輪王之位不起承迎以吾爲舍那之後晏然方坐皇帝覩其高尚伏以尊嚴

偏賜衣鉢特彰榮寵因請如來法味屈爲菩薩戒師親率六宮園遠供養仍圖畫於林光宮御製畫讚辭曰戒珠皎潔慧流清淨身局五篇心融八定學綜真典觀通實性維持法務綱統僧政律藏莫不傳芳象教因乎光盛比夫靈臺影像麟閣丹青功德義殊師臣禮異銓擇網管統帥僧徒者有司之任也以岸盛德廣大至行高邈思徧雨露特變章程所歷都白馬中興莊嚴薦福罔極等寺綱維總務皆承勅命深契物心天下以爲榮古今所未有中宗有懷罔極追福因心先於長安造薦福寺事不時就作者煩勞勅岸與工部尚書張錫同典其任廣開方便博施慈悲人或于來役無留務費約功倍帝甚嘉之頻邀賞揚何間昏曉旣荷天澤言酬恩地遂還光州

度人置寺於是祇陀苑鬱起僧坊拘鄰比
丘便爲人寶能事斯畢夫何恨哉江海一辭
星霜二紀每懷成道之所更迫鐘漏之期遂
去上京還至本處將申顧命精擇門人僧行
超玄儼者是稱上足也克傳珠髻之寶俾賜

家四

十三

金口之言右脇而卧示其泡幻也以開元五
年歲次丁巳八月十日滅度於會稽龍興道
場時年六十有四海竭何依山崩安仰天人
感慟道俗哀號執紼衣縗動盈萬計弟子龍
興寺慧武寺主義海都維那道融大禹寺懷
則大善寺道超齊明寺思一雲明寺慧周洪
邑寺懷瑩香巖寺懷彥平原寺道綱湖州大
雲寺子瑀興國寺慧纂等秀稟珪璋器承磨
琢荷導蒙之力懷括羽之恩思播芳塵必題
貞石乃請禮部侍郎姚弈爲碑紀德初岸本

文綱律師高足也及孝和所重其道克昌以
江表多行十誦律東南僧堅執罔知四分岸
請帝墨勅執行南山律宗伊宗盛于江淮間
者岸之力也

唐百濟國金山寺真表傳

釋真表者百濟人也家在金山世爲弋獵表
多躡捷弓矢最便當開元中逐獸之餘憇于
田畎間折柳條貫蝦蟇成弗置于水中擬爲
食調遂入山網捕因逐鹿由山北路歸家全
忘取貫墓歟至明年春獵次聞墓鳴就水見
去載所貫三十許蝦蟇猶活表于時歎惋自
責曰苦哉何爲口腹令彼經年受苦乃絕柳
條徐輕放縱因發意出家自思惟曰我若堂
下辭親室中割愛難離愆海莫揭愚籠由是
逃入深山以刀截髮苦到懺悔舉身撲地志

求戒法誓願要期彌勒菩薩授我戒法也夜
倍日功遶旋叩搥心心無間念念翹勤經于
七宵詰旦見地藏菩薩手搖金錫為表策發
教發戒緣作受前方便感斯瑞應歡喜徧身
勇猛過前二七日滿有大鬼現可怖相而推
表墜于巖下身無所傷匍匐就登石壇上加
復魔相未休百端千緒至第三七日質明有
吉祥鳥鳴曰菩薩來也乃見白雲若浸粉然
更無高下山川平滿成銀色世界兜率天主
逶迤自在儀衛陸離圍遶石壇香風華雨且
非凡世之景物焉爾時慈氏徐步而行至于
壇所垂手摩表頂曰善哉大丈夫求戒如是
至于再至于三蘇迷盧可手攘而却爾心終
不退乃為授法表身心和悅猶如三禪意識
與樂根相應也四萬二千福河常流一切功

德尋發天眼焉慈氏躬授三法衣瓦鉢復賜
名曰真表又於膝下出二物非牙非玉乃籤
檢之制也一題曰九者一題曰八者各二字
付度表云若人求戒當先悔罪罪福則持犯
性也更加一百八籤籤上署百八煩惱名目
如來戒人或九十日或四十日或三七日行
懺苦到精進期滿限終將九八二籤叅合百
八者佛前望空而擲其籤墮地以驗罪滅不
滅之相若百八籤飛逗四畔唯八九二籤卓
然壇心而立者即得上上品戒焉若眾籤雖
遠或一二來觸九八籤拈觀是何煩惱名抑
令前人重覆懺悔已正將重悔煩惱籤和九
八者擲其煩惱籤去者名中品戒焉若眾籤
埋覆九八者則罪不滅不得戒也設加懺悔
過九十日得下品戒焉慈氏重告誨云八者

新熏也九者本有焉囑累已天仗既迴山川
雲霽於是持天衣執天鉢猶如五夏比丘徇
道下山草木爲其低垂覆路殊無溪谷高下
之別飛禽鸞獸馴伏步前又聞空中唱告村
落聚邑言菩薩出山來何不迎接時則人民
男女布髮掩泥者脫衣覆路者種鬘鬘能承
足者華網美褥填坑者表咸曲副人情一一
迪踐有女子提半端白氎覆于途中表似驚
忙之色迴避別行女子怪其不平等表曰吾
非無慈不均也適觀氎縷間皆是狶子吾慮
傷生避其悞犯耳原其女子本屠家販買得
此布也自爾常有二虎左右隨行表語之曰
吾不入邪郭汝可導引至可修行處則乃緩
步而行三十來里就一山坡蹲踞于前時則
挂錫樹枝敷草端坐四望信士不勸自來同

造伽藍號金山寺焉後人求戒年年懺罪者
絕多今影堂中道具存焉

系曰表公革心變行一日千里果得慈氏爲
授戒法此五十受中何受邪通曰近上法見
諦自誓也發天眼通是證初二果也非諦理
現觀而何專據石壇與多子塔前自誓同也
或曰所授籤檢以驗罪滅之相諸聖教無文
莫同諸天傳授或魔鬼所爲不可爲後法乎
通曰若彰善癉惡利益不殊彌勒天主是天
傳授非魔必矣諸聖教中有懺罪求徵祥證
其罪滅不滅然其佛滅度彌勒降閻浮說瑜
伽豈可不爲後世法耶十誦律云雖非佛制
諸方爲清淨者不得不行也

唐安州十力寺秀律師傳

釋秀公者齊安人也髫年天然有離俗之意

焉既丁荼蓼便往蜀郡禮興律師諷誦經典易若溫尋又依之進具果通達毗尼乃爲興公傳律上足弟子歎如是四載入長安造宣律師門爲依止之客勤以忘勞涉十六年不離函丈窮幽諸部陶練數家將首疏爲宗本然向黃州報所生地次往安陸大揚講訓聲美所聞諸王牧守攸共遵承正化緇徒咸慕細行有貞固律師居于上席解冠諸生最顯清名餘皆後殿其諸成業不可勝筭春秋七十餘卒于十力寺本房焉

唐京師崇聖寺靈粵傳

釋靈粵者不知何許人也勤乎切問靡憚尋師乾封中於西明寺躬預南山宣師法席然其不拘常所或近文綱或親大慈皆求益也未塗懼失宣意隨講收采所聞號之曰記以

家四

十七

解刪補鈔也若然者推究造義章之始唯慈與粵也又別撰輕重訣故苑陵玄冑親覩其文故援引之以解量處輕重儀馬金革之故其訣湮滅無復可尋矣

唐京兆崇福寺滿意傳

釋滿意不知何許人也風神峭拔識量寬和經論旁通專於律學武德末所遇鄴都法礪律師作疏解曇無德律遂往振衣明其授受如是講導三十許年乃傳付觀音寺大亮律師亮方授越州曇一盛化之間出龍象之資無過意之門也矣

唐京兆西明寺崇業傳

釋崇業不知何許人也初同弋陽道岸學毗尼于文綱之法集業之服勤淬礪罔怠覺肆之間推居元長與淄州名恪齊名挺拔剛毅

過之美聲洋洋達于禁闥睿宗聖真皇帝操
心履道勅以舊邸造安國寺有詔業入承明
熏修別殿爲帝授菩薩戒施物優渥僉迴捨
修菩提寺殿宇抑由先不畜盈長之故也開
元中微疾囑弟子曰吾化窮數盡汝曹堅以
防川無令放逸語訖終于所居寺之別院業
即南山之嗣孫矣

唐越州法華山寺玄儼傳

濟

釋玄儼俗姓徐氏晉室南遷因官諸暨遂爲
縣族年始十二辭親從師事富春僧暉證聖
元年恩制度人始墮僧數絲懸溜寺儼幼而
明敏長則韶令標格峻整風儀凜然迨于弱
冠乃從光州岸師諮受具戒後乃遊詣上京
探賸律範遇崇福意律師并融濟律師皆名
匠一方南山上足咸能昇堂睹奧共所印可

家四

上

由是道尊戒潔名動京師安國授記並充大
德後還江左偏行四分因著輔篇記十卷羯
磨述章三篇至今僧徒遠近傳寫初光州岸
公嘗因假寐忽夢神僧謂曰玄儼當爲法器
云何教以小乘後乃命宣般若由是研精單
思採撫舊學撰金剛義疏七卷古德所不解
先達所未詳我則發揮光明若指諸掌誓以
一生宣講百徧越邑精舍時稱法華晉沙門
曇翼曾結庵山巔入是法三昧感徧吉菩薩
徒觀其塔類多寶涌出以證經官如轉輪飛
行而聽法雙鳥所以示兆今尚翔鳴六象所
以呈奇時猶隱現不可得而思議者蓋斯之
謂歟信如來之福庭是菩薩之隱岳儼乃考
盤是卜東鉢深棲建置戒壇招集律行若夫
秦衡上士燕代高僧數若稻麻筭同竹葦伏

膺請益躡屨擔簦宴坐不出幾三十載開元二十四年帝親注金剛般若經詔頒天下普令宣講都督河南元彥冲躬請儼重光聖日遂闡揚幽贊允合天心令盲者見日月之光龍尊者聞雷霆之響儼之演暢蓋有力焉夫樂

宋四

十九

小法者迷自我而為病通大方者憫開空之法道若夫會三歸一觸理真事自優波離已下猶或病諸而儼網紀小乘演暢大法晤佛境之非有識魔界之為空故能使涅槃將生死一如煩惱與菩提齊致發心而登佛地非我而誰白黑歸依當仁不讓昔僧護法師常居石城宴坐青壁仰其中峯如有佛像願造十丈以圖兜率良願未諧護公長逝梁武皇帝詔僧祐律師馳傳經理規模刻劃意匠纒施俄而山塚峯崩全身坐現合高百餘尺雖

金石絲竹四天之供施常聞功德莊嚴十地之瑠鑄尚闕儼乃內傾衣鉢外率檀那布以黃金之色鎔以白銀之相銅錫鉛錯球琳琅玕七寶由是渾成八珍於焉具足雖寶積獻蓋界現三千迦葉貢衣金踰十萬如須彌之現于大海若杲日之出于高山此又儼之功德不可思議者也故洛州刺史徐嶠工部尚書徐安貞咸以宗室設道友之禮園子司業康希銑太子賓客賀知章朝散大夫杭州臨安縣令朱元春亦以鄉曲具法朋之契開元二十六年載恩制度人採訪使潤州刺史齊澣越州都督景誠採訪盧見義泗州刺史王弼無不停旛淨境稟承法訓齊公乃方舟結乘奉迎儼於丹陽餘杭吳興諸郡令新度釋子躬授具戒自廣陵迄于信安地方千里道俗

受法者殆出萬人凡禮佛名經一百徧設無
遮大會十筵而入境住持舉無與比夫秉法
傳授從佛口生有門人法華曇俊崇默龍興
崇一開元智符稱心崇義香嚴懷節寶林洪
需覺引灌頂皆不傾油鉢無漏浮囊經不云
乎如梅檀林梅檀圍遶如師子王師子圍遶
信儼之威神有在而法主之功德不刊將知
三界無安百靈共盡此生已適於後息他世
應見于前心以天寶元載歲次壬午緣化已
畢十一月三日現疾于繩牀七日午時坐終
于戒壇院春秋六十有八粵其月二十五日
窆于寺南秦山之下高樹雙塔光明踰於白
雲列植千松秀色羅於明月經始則神邕崇
曉住持則唯湛道昭並躬護聖塲親傳智印
其餘三千門人五百弟子承般若之深法受

毗尼之密行盡號顯門無待彌勒天寶十五
載歲次景申萬齊融述頌德碑焉

唐杭州靈智寺德秀傳

釋德秀俗姓孫氏富陽人也少出塵區早棲

梵宇當圓戒檢正護浮囊匪定常師留神律

府講談之外嘗哀鬼神乏食恒以深更施其

飲食浙汭之民傾誠畏服及終于定山頗多

靈異則天寶初載也遷神座入塔時天降舍

利七顆門人以餅盛之緘于其塔或發之見

秀齒上生舍利紛紛而墜後人還累甃成浮

圖鄉人云恒有白蛇蟠屈守塔樵牧之童無

敢近者

唐開業寺愛同傳

釋愛同俗姓趙氏本天水人也代襲冠冕弱

齡挺拔惠然肯來為佛家子具戒後講彌沙

塞律遠近師稟若鱗羽宗乎鯤鳳也昔南宋朝屬實三藏覺壽譯成此律因出羯磨一卷時運遷移其本零落尋求不獲學者無依同遂於大律之內抄出羯磨一卷彼宗學者盛傳流布被事方全孝和之世神龍中盛重翻宣同與文綱等叅預譯場推爲證義義淨所出之經同有力焉著五分律疏十卷復遺囑西明寺玄通律師重施潤色後安史倣擾焚燎喪寺今無類矣

唐五臺山詮律師傳

釋詮律師者五臺縣人也綵服出家冠年受戒儀則清雅衆稟綱繩習毗尼宗秘菩薩行詮除訓徒外守默無撓遠近有事靡不豫知人謂爲得他心通也一食終日弊衣遮體不貯顆粒房無縷綜其強本節用造次不可及

也入滅之日祥雲鬱密天樂錚鏘闔寺僧徒皆聞異香馥馥乃召集寺衆執手告辭囑累門人加趺而滅云

唐揚州龍興寺法慎傳

釋法慎姓郭氏江都人也孩抱之歲誓齒空門親愛所鍾志不可奪從瑤臺成律師受具戒依太原寺東塔體解律文絕其所疑時賢推服或一言曲分於象表精理自得於環中聲振京師如晞愛日諸寺衆請綱領乃默然而東歸既還楊都俯允郡願恒誦金剛般若經如意輪般若佛心我得此心衆生亦得如意勝願我如此願衆生亦如謂天台止觀包一切經義東山法門是一切佛乘色空兩亡定慧雙照不可得而稱也慎暑不攝齊食不求飽居不易坐四方捨施歸於大衆一身有

無均於最下朝廷之士銜命往還路出維揚
終歲百數不踐門闕以爲大羞仰承一眄如
洗飢渴慎與人子言依於孝與人臣言依於
忠與人上言依於仁與人下言依於禮佛教
儒行合而爲一學者流誤故親校經論延來
者聽受故大起僧坊將警群迷故廣圖菩薩
因地善護諸命故曲濟衆生壽量以文字度
人故工於翰墨以法皆佛法故兼采儒流以
我慢爲防故自負衣鉢以規規爲任故綱正
緇林以發揮道宗故上行恭禮以感慕遺迹
故不遠他邦以龍象叅議故再至京國以軌
度端明故研精律部歟黃門侍郎盧藏用才
高名重罕於推挹一見于慎慕味循環不能
離坐退而歎曰宇宙之內信有高人黃門於
院中置以經藏嚴以香燈天地無疆像法常

第四

二十三

在太子少保陸象先兵部尚書畢構少府監
陸餘慶吏部侍郎嚴挺之河南尹崔希逸太
尉房瑄中書侍郎平章事崔渙禮部尚書李
愷辭人王昌齡著作郎綦毋潛僉所瞻奉願
同灑掃感動朝宰如此以天寶七載十月十
四日晨興盥漱就胡牀加跌心奉西方既曛
而滅於龍興寺別院春秋八十三夏六十二
緇素弟子北距泗沂南踰嶺徼望哭者千族
會葬者萬人其上首曰會稽曇一閩僧懷一
南康崇敬晉陵義宣錢塘譚山寺惠鸞洛京
法輪崇元鶴林寺法勵法海維揚惠疑明幽
靈祐靈一等罔不成樂說辯才入法華三昧
衆所知識物之依怙天上甘露正味調柔人
中象王利根成熟音樂樹下長流福慧之泉
雪山峯頂仰見清涼之月金剛決定煩惱無

餘優曇開敷香潔盈滿法施之恩郡君之感
哀奉色身經始靈塔于蕪城西蜀岡之原像
教也幽公自幼及衰恒所親侍後請吏部員
外郎趙郡李華為碑紀述大曆八年癸丑十
二月也大理司直張從申書趙郡李陽冰題
額其塔亦幽公經度建塔之地廣袤如素高
卑得中周臨四衢平視千里門人環蒔列栢
薦以名香其塔屬會昌中例皆毀焉

唐杭州華嚴寺道光傳

釋道光姓褚氏踰亂出家方冠受具詣光州
和尚學通毗尼于時夏淺德崇壇場屬望蓋
天資真士為東南義虎雲雨慈味笙鏞道聲
光持法華經創塔廟泊沒身不怠也上元元
年庚子仲秋示疾終于本寺春秋七十九法
臘五十八是日馳陽昧昧淫雨湔湔烈風崇

宋四

二十四

朝嘉木為折乃東土福盡之徵也俄然喜氣
五色亭亭如蓋移晷不散偏映精廬即西方
往生之意也初光未歿其月三日質明支疾
凝神依色身觀彌陀具相現在其前滿庭碧
華昔所未覩者四日昧爽有異人請光為和
尚遂開目彈指曰但發菩提心至五日曼陀
羅華自天而雨門人神烈義津追慕弗違各
分法味流布行化香火無窮云

唐揚州大雲寺鑒真傳

釋鑒真姓淳于氏廣陵江陽縣人也總州俊
明器度宏博能典謁矣隨父入大雲寺見佛
像感動夙心因白父求出家父奇其志許焉
登便就智滿禪師循其獎訓屬天后長安元
年詔於天下度僧乃為息慈配住本寺後改
為龍興殆中宗孝和帝神龍元年從道岸律

師受菩薩戒景龍元年詣長安至二年三月二十八日於實際寺依荊州恒景律師邊得戒雖新發意有老成風觀光兩京名師陶誘三藏教法數稔該通動必研幾曾無矜伐言旋淮海以戒律化誘鬱為一方宗首冰池印

家四

二十五

月適足清明猊座揚音良多響答時日本國有沙門榮叡普照等東來募法用補缺然於開元年中達于揚州爰來請問禮真足曰我國在海之中不知距齊州幾千萬里雖有法而無傳法人譬猶終夜有求於幽室非燭何見乎願師可能輟此方之利樂為海東之導師乎真觀其所以察其翹勤乃問之曰昔聞南岳思禪師生彼為國王興隆佛法是乎又聞彼國長屋曾造千袈裟來施中華名德復於衣緣繡偈云山川異域風月同天寄諸佛

子共結來緣以此思之誠是佛法有緣之地也默許行焉所言長屋者則相國也真乃慕比丘思託等一十四人買舟自廣陵賈經律法離岸乃天寶二載六月也至越州浦止署風山真夜夢甚靈異纔出洋遇惡風濤舟人顧其垂沒有投棄檣香木者聞空中聲云勿投棄時見舳艫各有神將介甲操仗焉尋時風定俄漂入蛇海其蛇長三丈餘色若錦文後入魚海魚長尺餘飛滿空中次一洋純見飛鳥集于舟背壓之幾沒泊出鳥海之水俄泊一島池且泓澄人飲甘美相次達于日本其國王歡喜迎入城大寺安止初於盧遮那殿前立壇為國王授菩薩戒次夫人王子等然後教本土有德沙門足滿十員度沙彌澄脩等四百人用白四羯磨法也又有王子一

品親田捨宅造寺號招提施水田一百頃自是已來長敷律藏受教者多彼國號大和尚傳戒律之始祖也以日本天平寶字七年癸卯歲五月五日無疾辭衆坐亡身不傾壞乃唐代宗廣德元年矣春秋七十七至今其身不施苧漆國王貴人信士時將寶香塗之僧思託著東征傳詳述焉

宋四

二十六

唐杭州天竺山靈隱寺守直傳

釋守直字堅道錢塘人也姓范氏齊信安太守理之八葉禮既冠衆君子器之夙有丘園之期不顧玄纁之錫遂詣蘇州支硎寺圓大師所受具足律儀是夜眼中光現長一丈餘待久方滅蓋得戒之驗也後抵江陵依眞公三年練行尋禮天下二百餘郡聖跡所至無不至焉見無畏三藏爲受菩薩戒聞普寂大

師傳楞伽心印講起信宗論二十餘徧南山律鈔四十徧平等一雨大小雙機在乎圓音未嘗少異乃立願誦華嚴經還於中宵夢神人施珠一顆及覺惘惘然如珠在握是歲入五臺山轉華嚴經二百徧追夙心也宏覽大藏經三過廣正見也至開元二十六年有制舉高行道俗請正名諱大林寺後移籍天竺住靈隱峯時大曆二年也至五年三月寓于龍興淨土院謂左右曰夫至人乘如而來乘如而去示其心然也而愚夫欲以長繩繫彼白日安可得乎吾景落桑榆豈淹久也以其年此月二十九日告終春秋七十一僧臘四十五其間臨壇度人多矣顯名者洞庭辯秀湖州皎然惠普道莊會稽清江清源杭州擇鄰神偃常州道進畫公著塔銘云

宋四

三十七

唐洪州大明寺嚴峻傳

釋嚴峻姓樊氏濰州人也父任碭州長史昭王府司馬峻性地夷然學習明利年及十九應進士舉條罹荼蓼思報劬勞投南陽佛寺後抵荊州玉泉山蘭若遇真禪師示其禪觀入城泊大雲寺峻秉持戒印用之不利憑附浮囊渡之攸往衆請臨壇復舉律之宗主僂俛承命忽逢觀淨禪師頓明心法大曆元年思往清涼山未達廬陵見顏魯公一言相契膠漆如也二年春宜春太守俾僧正馳疏請召四年春洪州刺史李華員外延入大明寺住止三月中俄命沐浴換衣舉望空虛合掌而逝春秋五十九遷塔弟子圓約等於寺前大泉池立碑存焉

唐會稽開元寺曇一傳

釋曇一姓張氏蓋韓人也其先軒轅賦姓至良佐漢侯于留魏晉已還衣冠繼代曾祖恒隋太常卿扈蹕楊都遂家于越恒生孝廉翼翼生處士葳葳生一令聞江南今四葉矣一宿植淨因生智慧性弱而敏悟長而聰明年十五從李洎先生習詩禮終日不違十六聽雲門寺茂亮法師經論一聞懸解法師異之謂其母孟氏曰此佛子也可令削髮當與授記亮即孝和皇帝菩薩戒師也一聞而歡喜有度世之志景龍中承恩出家隸在僧錄年三十八滿受具於丹陽玄昶律師學通事鈔於當陽曇勝律師既而鑽木見煙窺牆覩奧開元五年西遊長安依觀音寺大亮律師傳毗尼藏崇聖寺檀子法師學唯識俱舍等論安國寺印度沙門受菩薩戒於是蓮華不染之義甘

露甚深之旨一傳慧炬了作梵雄遠近瞻仰如宗師矣然刃有餘地時兼外學常問周易於左常侍褚無量論史記於國子司業馬貞遂漁獵百氏囊括六籍增廣聞見自是儒家調御人天皆因佛事公卿響慕京師藉甚時丞相燕國公張說廣平宋璟尚書蘇瓌充國陸象先秘書監賀知章宣州涇縣令萬齊融皆以同聲並為師友雖支許之會虛嘉宗雷之集廬岳未云多也四分律者後秦三藏法師梵僧佛陀耶舍傳誦中華與羅什法師共為翻譯今之講授自此員來魏法聰律師始為演說聰授道覆覆授光洎隋朝相部勵律師作疏十卷西京崇福寺滿意律師盛傳此疏付授亮律師其所傳授一一依勵律師疏及唐初終南宣律師四分律鈔三卷詳略同

家言

三九

異自著發正義記十卷明兩宗之踳駁發五部之鈐鍵後學開悟夜行得燭前疑泮釋陽和解冰佛日昭晰而再中法棟崢嶸以高峙發正記中斥破南山持犯中可見也二十五年仗錫東歸明年詔置開元寺長史張楚舉為寺主因而居焉一聲振京華道高吳會布大慈以攝眾修萬行以表儀順風問道者轂擊肩摩函文請益者波委雲萃虛受之量隨而演說故前後講四分律三十五徧刪補鈔二十餘徧焉江淮釋子受木叉者非一登壇即不為得法從持僧律蓋度人十萬計矣至德之際國步多艱緇徒慢法罕率經教國相王公出鎮于越以一德名素高請為僧統一變清淨大闡熏修泱旬之間迴邪入正善誘潛化皆此類焉始者一入關謁明達法師目

之曰汝人中師子也又遇遵善寺尼慈和歌
曰曇一師解毗尼大聰明更無疑爲達人之
所諺多矣天寶十四載淪河潮水南激錢塘
大雲伽藍當茲湍淠因請一講律學徒千人
咸發大願每上念摩訶般若乃止濤激以福
伍胥龍王用茲莊嚴祈於衛護五月晦夜惚
恍之間見一神人衣冠甚偉稽首謝曰蒙垂
法施即改波流未逾九十日漲沙五十里道
俗驚歎得未曾有一蔚爲法主大揚教跡發
明前佛之付囑保證後佛之護念四句作偈
受持者了於未了一音演法諦聽者聞所不
聞非夫天地淳精江山粹靈與法作程間世
而生孰能玄通審證如此其大者乎寺中洪
鐘一所作也遠徵鳧氏近法雷門生存累年
匠其規制歿後三日成於鎔造聲應百里扛

家四

三十

乎萬鈞蒲牢呌而地震師子吼而山嶽警悟
聾俗導引迷方胡可言也法謝形離薪盡火
滅以大曆六年十一月十七日遷化於寺之
律院報齡八十僧臘六十一即以明年十一
月二十四日遷座於秦望山從先和尚之塋
也一春秋已高精爽逾勵旣不衰憊初無疾
苦忽謂侍者曰吾將掃禮墳塔歸骨於此數
日之後奄然而終江淮之南河洛之表衣纒
制服執紼送喪號哭滿山旛華蔽野比夫劇
孟之母送車千乘孔丘之墓栽樹萬株可同
年哉門人越州妙喜寺常照建法寺清源湖
州龍興寺神玩宣州隱靜寺道昂杭州龍興
寺義賓台州國清寺湛然蘇州開元寺辯秀
潤州栖霞寺昭亮常州龍興寺法俊等早發
童蒙咸承訓誘三千弟子仰梁木而增悲八

